


**TEZAUUR LITURGIC**  
**21 SEPTEMBRIE**

**SLUJBA**  
**SF. IERARH**  
**DIMITRIE,**  
**MITROPOLITUL**  
**ROSTOVULUI**  
**AFLAREA MOAȘTELOR**



**MOSCOVA, 1763**



**Септѣмврія въ 21-й дѣнь  
Служба иже во святыхъ отцу  
нашему Димитрію, митрополиту  
Ростовскому, новому чудотворцу  
Егоже обрѣтеніе мощей  
празднуется**

**НА МАЛЪЙ ВЕЧЕРНИ,  
На Господи возвахъ: стихиры, гласъ 1.  
Подобенъ: Небесныхъ чиновъ.**

**В**малѣ былъ еси вѣренъ, Димитріе,\* надъ многими ты постави Господь,\* и вшелъ еси въ радость Господа твоего,\* идѣже предстоя Ему,\* молишися о душахъ нашихъ.

**Въ** единонадесятый часъ потрудишься,\* равенъ динарій съ первыми приемиши:\* житія бо святыхъ написавый намъ,\* и самъ въ книги живота вѣчнаго\* съ ними написался еси.

**О**трочество твое на ученіе,\* юношество на подвиги монашескія,\* мужественный же возрастъ на пользу всѣмъ освятилъ еси,\* ихже ради ты нынѣ\* во святыхъ почитаемъ.

**Я**коже міръ и вся красная міра,\* тако и начальство надъ братією оставивый,\* вселился еси въ Кіевъ паки близъ пещеръ,\* отонудуже

бісеръ житій святыхъ\* трудами твоими  
ископаль еси намъ.

**Слава, гласъ тойже:**

Препрославленъ буди, Трипостасный Боже  
нашъ, яко въ поздняя лѣта, новаго чудотворца  
Димитрія, Россіи дароваль еси.

**И нынѣ богородиченъ, гласъ тойже:**

Небесныхъ чиновъ радование, на земли  
человѣковъ крѣпкое предстательство, Пречистая  
Дѣво, спаси ны, иже къ Тебѣ прибѣгающія, яко  
на Тя упованіе по Бозѣ, Богородице,  
возложихомъ.

**Аще же отданіе Воздвиженію, праздника.**

**На стиховнѣ стихирѣ, гласъ 2, самогласенъ:**

Радуйся, граде Ростове, яко отъ Кіева, съ  
преждепочившими въ тебѣ, и сего пастыря  
Димитрія, нынѣ во святыхъ почитаемаго, пріяль  
еси.

**Стихъ:** Священницы Твои облекутся въ  
правду, [и преподобнии Твои возрадуются].

Радуйся, священное сословіе, въ тебѣ бо возсія  
священноначалникъ Димитрій, на негоже  
изліяся нетлѣніе, аки муро на брадѹ Аарону.

**Стихъ:** Честна предъ Господемъ смѣрть  
преподобныхъ Его.

Ра́дуйся, Димі́тріе, святи́телей похва́ло, священниковъ́ сла́во, пра́вило мона́ховъ, Це́ркве утвержде́ніе.

**Сла́ва, гла́сь то́йже:**

Возда́ждь сла́ву Бо́гу твоему́, Росси́е, я́ко Просла́вивый тебе́ пре́жде святи́ми не оставя́етъ прославля́ти и ны́нѣ.

**И ны́нѣ, гла́сь то́йже: [Аще нѣсть отда́нія.]**

Все́ упова́ніе моё на Тя́ возлагаю́, Ма́ти Бо́жія, сохрани́ мя подь кро́вомъ Твои́мъ.

**По Ны́нѣ отпу́щаеши.., тропа́рь свята́го, гла́сь 8:**

Правосла́вія ревни́телю и раско́ла искорени́телю, Росси́йскій цѣ́лѣбниче и но́вый къ Бо́гу моли́твенниче, списа́ньми твои́ми всѣ́хъ [1] уцѣ́ломудри́ль еси́. Цѣ́внице духо́вная, Димі́тріе блаже́нне, моли́ Христа́ Бо́га спастися Импера́тору на́шему [и́мярекъ], все́му наслѣ́дію и держа́вѣ Его́. [2].

**Сла́ва, и ны́нѣ, богоро́дичень: [Аще нѣсть отда́нія пра́зднику.]**

Иже на́съ ра́ди рождѣ́йся отъ Дѣ́вы, и распя́тіе претерпѣ́въ, Благо́й, испровер́гій сме́ртію сме́рть и Воскресе́ніе явлей́ я́ко Бо́гъ, не презри́, яже созда́ль еси́ руко́ю Твоёю, яви́ чело́вѣколю́біе Твоё, Ми́лостиве. Приими́ ро́ждшую Тя́,

Богородицу, молящуюся за ны́, и спаси́, Спасе́ нашъ, люди́ отчаянныя.

## **НА ВЕЛИЦЪЙ ВЕЧЕРНИ,**

**Блаже́нь му́жь, антифо́нь 1-й. [На Го́споди  
воззва́хъ:] стихи́ры на 8, гласъ 8. Подобе́нь:**

**О**, пресла́внаго чудесе́!

**Д**не́сь свидѣ́тельство сы́на Гро́мова\* и на тебѣ́  
сбы́тся, свя́те Дими́тріе,\* войсти́нну бо  
свидѣ́ствовася ти́ отъ всѣ́хъ\* и отъ Са́мыя  
Исти́ны,\* я́ко твои́ми моли́твами немо́щнии  
врачу́ются,\* слѣ́пци прози́рають, хро́ми  
ходятъ,\* де́мони отгоня́ются и вся́ ско́рби  
рѣ́шатся.\* Сего́ ра́ди почита́емъ тя́ вси́,\* но́вый  
нашъ Росси́йскій чудотво́рче.

**Н**овоявле́нне святите́лю Дими́тріе,\* въ ча́сь  
сме́рти, па́че же живота́ твоего́\* чре́сла любо́вию  
препоя́салъ еси́,\* и но́зѣ обу́вь во упова́ние  
Христо́во,\* свѣ́тильникъ вѣ́ры украси́лъ еси́  
еле́емъ дѣ́лъ благи́хъ.\* Тѣ́мъ съ му́дрыми вше́лъ  
еси́ въ небе́сный черто́гъ,\* идѣ́же предсто́я  
Влади́цѣ Христу́, помоли́ся,\* да прише́дшу  
полуно́щному во́плю,\* изы́демъ въ срѣ́теніе Е́му  
и мы́ гото́ви.

**Ж**итіе́ несквѣ́рно, терпѣ́ніе, кро́тость и любо́вь  
нелице́мѣрну, возде́ржаніе безме́рное,  
всено́щное стоя́ніе, умиле́ніе божѣ́ственное, вѣ́ру

и надежду истинну, съ милованіемъ, отче, стяжавъ, яко ангель пожилъ еси на земли съ тѣломъ, Димитріе блаженне, молитвенниче о душахъ нашихъ [3].

**Е**ще отъ юна возраста Богу освященъ былъ еси, архіерее, мудрости рачителю. Тѣмже потщался еси тлѣнными вѣчнующая стяжати, воздержанія бродами себе обложивъ, плоть дѣху повинулъ еси, тѣмже и по честнѣмъ твоѣмъ преставленіи совокупляясь съ небесными ликостояніи, ихже житію во плоти поревновалъ еси. Христа, Емуже отъ юности послужилъ еси, моли спастися всѣмъ, честное мощей твоихъ обрѣтеніе прісно славящимъ пѣсньми.

### **Слава, гласъ 8:**

**К**расны нозѣ благовѣствующихъ миръ, благовѣствующихъ благая, красны войстинну нозѣ и твои, о Димитріе, паче же весь красенъ еси, яко внигда прити тебѣ на престолъ свой, абие миръ всѣмъ благовѣстилъ еси: миръ Церквамъ и градомъ, миръ домамъ и всякому сожителству. Миръ Божій, якоже Павелъ, вѣщаль еси, да водворяется въ сердцахъ вашихъ, и миръ имѣйте и святыню со всѣми, братіе. Тако убо и нынѣ посѣтивый насъ явленіемъ мощей твоихъ, благовѣствуй миръ и благоденствіе Миролубивому Императору нашему [имярекъ]. И испроси скоро на враги

побѣду и одолѣніе, наслѣдію же и державѣ  
Его благотише, и мірови велію милость.

**И нынѣ, богородиченъ, гласъ тойже: [Аще  
нѣсть отданія.]**

**Ц**арь небесный за человеколюбіе на земли  
явился и съ человеки поживе, от Дѣвы бо Чистыя  
плоть пріемый и изъ Нея прошедый съ  
воспріятіемъ, единъ естъ Сынъ, сугубъ  
естествомъ, но не впостаію. Тѣмже, совершенна  
Того Бога и совершенна Человека воистинну  
проповѣдающе, исповѣдуемъ Христа Бога  
нашего: Егоже моли, Мати Безневѣстная,  
помиловатися душамъ нашимъ.

**Входъ. Прокименъ дне, и чтенія.  
Притчей чтеніе.**

**П**амять праведнаго съ похвалами, и  
благословеніе Господне на главѣ его. Блаженъ  
человѣкъ, иже обрѣте премудрость, и смертенъ,  
иже увѣдѣ разумъ. Лучше бо сію куповати,  
нежели злата и сребра сокровища. Честнѣйшая  
же естъ каменій многоцѣнныхъ, все же честное  
недостойно ея естъ. Долгота бо дней и лѣта  
живота въ десницѣ ея, въ шуйцѣ же ея богатство  
и слава. Отъ устъ ея исходитъ правда, законъ же  
и милость на языкѣ нѣсуть. Послушайте убо  
мене, о чада, честная бо реку, и блаженъ  
человѣкъ, иже пути моя сохранитъ: исходи бо

мой — исходи живота, и уготовляется хотѣніе отъ Господа. Сего ради молю васъ и предлагаю мой гласъ сыновомъ человѣческимъ. Яко азъ, премудрость, устроихъ совѣтъ, и разумъ и смыслъ азъ призвахъ. Мой совѣтъ и утверждение, мой разумъ, моя же крѣпость. Азъ менѣ любящія люблю, ищущи же менѣ обрящутъ благодать. Разумѣйте убо, незлобиви, коварство, ненаказани же, прилагайте сердца. Послушайте менѣ и паки, честная бо реку, и отверзу отъ устенъ правая, яко истинѣ поучится гортань мой, мерзки же предо мною устнѣ лживыя. Съ правдою вси глаголы устъ моихъ, ничтоже въ нихъ стропотно, ниже развращенно. Вся права суть разумѣвающимъ и проста обрѣтающимъ разумъ. Научаю бо васъ истинѣ, да будетъ о Господѣ надежда ваша, и исполнитесь Духа.

### **Притчей чтеніе.**

**У**ста праведнаго каплють премудрость, языкъ же неправеднаго погибнетъ. Устнѣ мужей праведныхъ каплють благодати, уста же нечестивыхъ развращаются. Мѣрила льстивая мерзость предъ Господемъ, всѣ же праведный пріятель Ему. Идѣже аще внидетъ досаждение, тамо и безчестіе, уста же смиренныхъ поучаются премудрости. Совершение правыхъ наставитъ ихъ, и поползновение отрицающихся упасетъ ихъ. Не пользуют имѣнія въ день ярости,

п'равда же избавить отъ см'ерти. Умеръ праведный, остави раскаяние, нар'учна же быва'етъ и посм'ятельна нечестивыхъ па'губа. П'равда непор'очнаго исправля'етъ пути, въ нечест'ие же па'даетъ неправда. П'равда мужей правыхъ избавить ихъ, безсов'стиемъ же пл'няются беззаконнии. Скончавшуся мужу праведну, не погибнетъ надежда, похвала же нечестивыхъ погибнетъ. П'раведникъ отъ лова уб'гнетъ, въ негоже м'сто преда'ется нечестивый. Во уст'хъ нечестивыхъ с'тъ гражданомъ, чувство же праведныхъ благопосп'шное. Во благихъ праведныхъ исправится градъ, и въ пог'бели нечестивыхъ радован'е. Во благословен'ии правыхъ возвысится градъ, усты же нечестивыхъ раскопа'ется. Руга'ется гражданомъ лишенный разума, мужъ же му'дрый безмолв'е водить.

### **Премудрости Соломоновы чт'ение.**

П'раведникъ, аще постигнетъ скончати, въ покой б'удетъ. Старость бо честна не многол'тна, ниже въ числ' л'тъ исчита'ется. С'д'ина же е'сть му'дрость чело'вомъ, и возрастъ старости — жит'е нескв'рное. Благоугодень Бо'гови б'ивъ, возлюбленъ б'истъ, и живый посре'д' гр'шникъ, преставленъ б'истъ. Восхищенъ б'истъ, да не злоба изм'нитъ разума его или л'сть прельститъ ду'шу его. Рач'ение бо злобы помрача'етъ добрая и

пареніе похоти, премѣняетъ умъ незлѣбивъ. Скончався вмалѣ, исполни лѣта долга, угодна бо бѣ Господеви душа его, сего ради потщася отъ среды лукавствія. Людіе же видѣвше и не разумѣвше, ниже положше въ помышленіи таковое, яко благодать и милость въ преподобныхъ Его и посѣщеніе во избранныхъ Его.

### **На литіи стихиры, гласъ 7:**

**В**елій еси, Господи, и дивенъ во святыхъ Своихъ, яко по успеніи и во гробѣ Самуилевы кости пророчествуютъ, и Елиссеевы мертвыя мертвыхъ воскрешаютъ, Иліина же милость сюду и сюду воды раздѣляетъ. Чудна сія воистину и дивна, но чуднѣе снъ Петрова и главоотяжи Павла, яже духи нечисты прогоняли и исцѣляли всяку болѣзнь и язву. Симъ всѣмъ почудившеся чудесамъ, прославимъ чудодѣющаго Бога и нынѣ, во святомъ чудотворцѣ Димитріи.

### **Гласъ 6:**

**П**ріемляй молитвы святыхъ Твоихъ на небесіи и обѣщавый ради праведныхъ не погубити грѣшныя на земли, повелѣлъ еси тыя въ молитву призывати къ Тебѣ, Господи: идите бо, глаголеши, къ рабу Моему Іову, и сотворитъ жертву и молитву за вы. Но и самъ Твой угольникъ Моисей, и въ пещи трие отроцы, егда

умоляху Тя за люди согрѣшшія, прѣжде почившихъ праотцевъ святыхъ представляху Ти. Сице и нынѣ, молящеся Тебѣ, Христе Боже нашъ, приводимъ въ молитву угодника Твоего Димитрія, свято пожившаго, да его ради праведника пощадиши насъ, грѣшныхъ, и спасеши души наша.

### **Гласъ 5:**

**П**риидите, православныхъ собори, воспоймъ святителя, учениемъ къ богоразумію насъ наставляшаго, источника чудесъ предивнаго, Церкви свѣтильника пресвѣтлаго, учителя Ростову премудраго и всей Россіи прекрасное удобреніе. Той бо избавляетъ насъ отъ всякихъ злыхъ искушеній и бѣдъ и молится о душахъ нашихъ.

**Х**ристово стадо словесныхъ овецъ на злацѣ благочестія добрѣ упаслъ еси, іерарше. Тѣмже и по преставленіи церковныхъ твоихъ чадъ не оставляй, но посѣщай. И Святѣй Троице со архіереи предстоя, моли спасти вся, честныхъ твоихъ мощей обрѣтеніе любовію почитающія, Димитріе прехвальне.

**З**наменіи и чудесы тебе Господь прослави, святителю Димитріе, прогоняеши бо дѹхи и врачѹеши страсти, дѹши просвѣщаеши вѣрныхъ, приходящихъ ко святому твоему гробу, ангеловъ

равностоятелю, архіереевъ сопрестолне, апостоловъ единоправне, благовѣрія поборниче.

### **Слава, гласъ 6:**

**Г**радъ освятися, народи благословишася, Церковь первородныхъ духомъ ликовствуесть во обрѣтеніи честныхъ твоихъ мощей, іерарше Димитріе, съ людьми зовущи: ты моя крѣпость и утверждѣніе, ты моя доброта, и тобою хвалюся. Молися спасти вся, любовью всемірное святыхъ твоихъ мощей обрѣтеніе прісно славящія.

### **И нынѣ, богородиченъ, гласъ тойже: [Аще нѣсть отданія.]**

**Т**ворецъ и Избавитель мой, Пречистая, Христось Господь, изъ Твоихъ ложеснъ прошедъ, въ мя оболкйся, пѣрвыя клятвы Адама свободи. Тѣмже Ти, Всечистая, яко Божіи Матери же и Дѣвѣ, войстинну вопіемъ немолчно: радуйся ангельски, радуйся, Владычице, предстательство, и покрове, и спасеніе душъ нашихъ.

### **На стиховнѣ стихіры, гласъ 3:**

**С**лушая гласа Господня, призывающаго тя къ Себѣ, готовъ былъ еси, Димитріе, къ исходу твоему отъ сея жизни. Въ вечеръ и въ полунощи, въ пѣтлоглашеніе же и утро не воздремалъ еси, ожидая къ себѣ Господа, дондеже, срѣтивъ, вшелъ еси къ Немю въ радость вѣчную, идѣже

предстоя́ Ему́, моли́шися, да пода́сть и на́мъ жи́знь святу́ и кончи́ну христи́анскую.

**Стихъ:** Священницы́ Твои́ облеку́тся въ пра́вду и преподо́бнии Твои́ возра́дуются.

Облекі́йся ны́нѣ за по́двиги въ преподо́біе, облéкся еси́ и во святы́ню за незло́біе, я́ко жениху́ цѣломудренну, возложи́ ти вѣне́ць чудотворе́нія, и я́ко невѣсту, украси́ тя Госпо́дь за чистоту́ нетлѣ́ніемъ. Дарова́ же ти сокрови́ща неветша́ющая на небеси́, я́ко иноческую нищету́ соблю́ль еси́ по сме́рть на земли́, вѣруя Бо́гу бы́ти пріятнѣе се́, а́ще кто́ ты помяне́тъ ничто́же оста́вивша по себѣ́. Помина́й убо на́съ ты́ па́че, приснопа́мятный Димі́тріе, мно́го прегрѣ́шеній иму́щихъ, но ничто́же отъ благи́хъ дѣ́лъ содержа́щихъ.

**Стихъ:** Честна́ предъ́ Господе́мъ сме́рть преподо́бныхъ Его́.

Любопы́тную десни́цу да отрази́ши отъ поиска́нія имѣ́ній твои́хъ, предвозвѣсти́ль еси́ въ завѣ́тъ, нищелю́бче Димі́тріе, глаго́ля: я́ко а́ще и мно́го кто́ потруди́тся о тѣ́хъ, но ничто́же обря́щеть. Отъ него́же и мы́ научи́мся, бра́тіе, я́ко лу́чше не имѣ́ти или́ расточа́ти на ни́щія, не́же собира́ти и оста́вляти по себѣ́. Си́це бо мо́жемъ купи́ти у Христа́ Ца́рство небесное́.

### **Сла́ва, гла́сь 4:**

**В**озра́дуемся, Росси́йстии собо́ри, похвалу́ Ростовскую ублажа́юще, чудотво́рца Дими́трія, се́й бо мно́го потруди́ся въ списа́нии душеполе́зныхъ на́мъ кни́гъ, и́миже развра́щенныя отъ пра́ваго благоче́стїя пути́ ко и́стинѣ направлѣются, правосла́вныхъ же сердца́ въ правове́рїи утвержда́ются. Ему́же и возопи́мъ: О, прему́дрый учи́телю, моли́ся Христу́, да твои́мъ уче́ніемъ наста́вляеми, получи́мъ живо́тъ вѣчный.

### **И ны́нѣ, отда́нїю пра́здника, или́ богоро́дичень, гла́сь тойже:**

**П**ри́зри на моле́нїя Твои́хъ ра́бъ, Всенепоро́чная, утоля́ющи лю́тая на ны́ воста́нїя, всякія ско́рби на́съ измѣня́ющи, Тя́ бо еди́ну тве́рдое и извѣ́стное утвержде́ніе и́мамы, и Твое́ предста́тельство стяжа́хомъ, да не постыди́мся, Влады́чице, Тя́ призыва́ющи, потщи́ся на умоле́ніе Тебѣ́ вѣ́рно вопію́щихъ: ра́дуйся, Влады́чице, всѣ́хъ по́моще, ра́досте и покрове́, и спасе́ніе ду́шъ на́шихъ.

**На благослове́ніи хлѣ́бовъ, по ны́нѣ**  
отпу́щаеши...

**Тропа́рь [свѣта́го] два́жды и пра́зднику**  
**единожды.**

## НА УТРЕНИ,

**На Бѡгъ Господь: тропарь святителю дважды.  
Слава, и нынѣ, праздника, или  
богородиченъ.**

**По 1-мъ стихологіи съдаленъ, гласъ 3:**

**М**арѣа и Марія, сестры Лазаревы, ова, сѣдящи при ногу Исусову, слышаше слово Его, ова же печашеся о Христовомъ угощеніи; ты же, обоемъ симъ подражая, и въ различныхъ послушаніяхъ Христово иго сладць носиль еси, и слыша и творя самъ слово Божіе, томужде протчихъ училь еси. Тѣмъ якоже на земли отъ царей и владыкъ различныхъ почести, тако и на небеси неотъемлемыя тѣхъ части у Христа сподобился. Егоже моли, да подасть душамъ нашимъ богомудріе Маріино, тѣлесемъ же трудолюбіе Марѣино. **[Дважды.]**

**Слава, и нынѣ, отданію.**

**Или сей богородиченъ, гласъ тойже:**

**Е**гда сядеть на престолѣ славы Своея Судія нелицемѣрный, тогда, о Богоневѣстная Владычице Маріе, всеильнымъ предстательствомъ Твоимъ заступи мя; ни вниманія бо, ни трудолюбія стяжахъ сестръ Лазаревыхъ, но все житіе мое иждихъ, прилѣжа самолюбію и молвамъ житейскимъ. Тѣмже прѣжде врѣмене прибѣгаю подъ кровъ Твою и

вопію: заступи́ мя, о Всеблагая́ моя́ Покровительнице, въ день онъ Судный.

**По 2-мъ стихословіи съдалень, гласъ 8:**

**Я**ко на съдалищи съдоша и у насъ суевѣрствующи фарисеи, показующе себе быти предъ невѣжы законоучителми, но не разумѣюще ни яже сами утверждають, ни яже предъ другими глаголють, ихже дерзкое по пришествіи твоёмъ въ паству увидѣвъ нейстовство, абие ревнуня по благочестіи, возревноваль еси, и аки Илія, вся таиноводительства расколническая изведъ на средѹ, посрамиль еси, оставивъ намъ въ познаніе лжи ихъ обличительное наставленіе. Егоже ради ты нынѣ яко истиннаго наставника нашего и учителя почитаемъ вси, богомудре Димитріе. **[Дважды.]**

**Слава, и нынѣ, отданію.**

**Или сей богородичень, гласъ тойже:**

**Н**а всякъ день и часъ чрезъ Моисея и пророковъ взываетъ Сынъ Твой на покаяніе мя, о Госпоже Владычице, но азъ не токмо симъ, но ниже аще кто и отъ мертвыхъ восталь бы, небрегу внимати. Что убо будетъ и на что надѣюся азъ, окаянный? Токмо къ Тебѣ со слезами вопію: направи слухъ и умъ мой къ

призывающему мя Сыну Твоему, да имиже  
вѣсть судьбами наставитъ мя на путь покаянія.

### **По поліелѣи сѣдаленъ, гласъ 7:**

**Я**ко финиксъ, процвѣлъ еси нетлѣніемъ отъ  
земли, и яко кедръ, иже въ Ливанѣ, умножился  
еси чудесы, превознесся еси явлѣніемъ, яко  
градъ, верху стояй, и возсіялъ еси паметію  
твоєю, яко свѣтилникъ изъ-подъ спуда на свѣтъ.  
Яже вся на тебѣ видяще сбытія, прославляемъ  
Возвеличившаго тя тако во святыхъ Своихъ. Ты  
же яко имѣя дерзновение ко Христу Господу,  
помолися, святоявленне Димитріе, да спасетъ и  
просвѣтитъ души наша. **[Дважды.]**

### **Слава, и нынѣ отданію.**

### **Или сей богородиченъ, гласъ тойже:**

**П**ророцы Тя предвозвѣстиша, апостоли Тя  
проповѣдаша, мученицы прославиша, святителие  
ублажиша. Тѣмъ и мы съ ними, Богородицу, Тя  
исповѣдающе, благочестно величаемъ.

### **Степенна 4-го гласа, антифонъ 1-й.**

**Прокименъ, гласъ 4:** Уста моя возглаголютъ  
премудрость и поученіе сердца моего  
разумъ. **Стихъ:** Уста праведнаго поучатся  
премудрости, [и языкъ его возглаголетъ  
судъ]. **Всякое дыханіе... Евангеліе отъ Іоанна,  
зачало 35, [отъ полу].**

## **По 50-мъ псалмъ стихира, гласъ 6:**

**И**зліяся благодать во устнахъ твоихъ, святителю Димитріе, ученми бо твоими Церковь украсилъ еси, истину Православія уяснилъ, пагубное же расколническое мудрованіе посрамилъ еси. Тъмъ якоже въ житіи, тако по отшествіи твоёмъ потщися, да поне чудесы твоими увѣряеми, приидутъ въ чувство и прославятъ купно съ нами Тривпостаснаго Бога отъ насъ исходящии, но не отъ насъ сущии.

## **Канонъ святителю Димитрію на 8, гласъ 6. Пѣснь 1.**

**Ирмосъ:** *Яко по сѹху пѣшешествовавъ Израиль по безднѣ стопами, гонителя фараона видя потопляема, Богу побѣдную пѣснь поимъ, вопіяше.*

**Г**ордому фараону въ ожесточеніи уподобихся и того потопленію за нераскаяніе подпадохъ, но ты, святій Димитріе, путеводитель ми буди къ покаянію, яко да и азъ отъ Христа получу входъ въ Землю Обѣтованную.

**Н**и себе пощадихъ, ни ближняго помиловахъ, но присно чреву, яко на Египеть, работая, и самъ истаеваю голодомъ и жаждою, и другимъ отъ крупиць падающихъ насыщатися возбраняю. Сего ради къ тебѣ, пастырю добрый Димитріе, истаеваемый, прибѣгохъ, да

напитаеши мя, аки манною, словесы твоими и напоиши мя слезами умиления.

**У**тыхъ, утолстѣхъ, забыхъ Тя, Бога, спасающаго мя, тяжело бо ушима слышу и сердцемъ разумѣю, аще и призываеши мя къ Себѣ чрезъ законъ и пророки. Тѣмже, о Творче и Избавителю мой! житіемъ и ученіемъ угодника Твоего Димитрія исправи и спаси мя.

**Богородичень:** **К**ая польза въ крови моей, вегда сходити ми во истлѣніе? или что приложится мнѣ, аще и весь міръ приобретаю, душу же погублю? Но Ты, Владычице, помози мнѣ, да получу отъ Христа Спаса Твоего прощѣніе грѣховъ и жизнь вѣчную.

### **Пѣснь 3.**

**Ирмосъ:** **Н**ѣсть святъ, якоже Ты, Господи Боже мой, вознесый рогъ вѣрныхъ Твоихъ, Блаже, и утвердивый насъ на камени исповѣданія Твоего.

**У**твердися сердце мое въ памятозлѣбіи, разширишася уста моя на смѣхи и осужденія, возвеселихся о паденіи ближняго моего, ученію же твоему богоугодному, святителю, ни мало внимахъ. Понѣ убо чудесы твоими премѣни мя отсѣль и сотвори подражателя житію твоему.

**И**ныя страны хвалятся премудростію своею, другія сілою и богатствомъ, мы же похваляемся

многочлѣбными святыхъ Божіихъ и твоими  
мощми, чудотворче Димитріе, отъ нихже  
получаемъ тѣлесемъ здравіе и душамъ нашимъ  
спасительное врачеваніе.

**Д**ай моли́тву моля́щимся и благословля́й въ  
лѣта на́ша па́мьятъ пра́ведника Твоего́, Димитрі́я,  
пода́ждь моли́твами того́ крѣ́пость Императору  
на́шему **[имярекъ]** и вознеси́ ро́гъ Пома́занника  
Твоего́, Го́споди.

**Богородичень:** Взбра́нная Побѣдительно́е и  
крѣ́пкая во искуше́ніяхъ на́шихъ Засту́пнице, не  
презри грѣ́хъ ради на́шихъ ускори́ти на по́мощь,  
и отъ бѣ́ды изба́вити насъ, едина Чистая, едина  
Благословенная.

### **Съда́лень, гла́сь 8:**

**Д**рѣвнихъ преподо́бію подража́я, освяти́ль еси́  
житіе́ твоё на службу́ Бо́гови въ осмоена́десять  
лѣто. Отне́льже и бы́ль еси́ вели́къ мона́хъ,  
священникъ, учи́тель, іера́рхъ, ны́нѣ же  
чудотворецъ, и моли́твенникъ о душа́хъ  
нашихъ. **[Два́жды.]**

**Сла́ва, и ны́нѣ отда́нію.**

**Или́ се́й богородичень, гла́сь тойже.**

**З**латокованны́й киво́тъ вмѣща́ше въ себѣ́  
дрѣвле богопи́санны́й зако́нъ и небѣ́сную ма́нну.  
Ты́ же, Богородительнице, заче́нши, плоти́ю

Сы́на Бо́жия роди́ла еси́ во обновле́ние и спасе́ние ду́шъ на́шихъ.

#### **Пѣснь 4.**

**Ирмо́сь:** *Хри́сто́сь моя́ си́ла, Бо́гъ и Госпо́дь, честна́я Це́рковь боголю́бно пое́тъ, взыва́ющи, отъ смы́сла чи́ста, о Госпо́дь прáзднующи.*

**П**озна́ во́ль ясли́ гóспода сво́его и осе́ль стяжа́вшаго егó, азъ же безсло́весными́ страстми́ удали́хся отъ Творца́ моего́, но ты́, па́стырю́ благи́й Димит́рие, яко овча́ заблúждшее, взыщи́ мене́ и Христо́ву ста́ду сопричти́ мя.

**У**до́бъе отъ те́рнiя собира́ти виногра́дное грозди́е и отъ ре́пiя смоко́вiе, не́же отъ жесто́каго моего́ се́рдца приноси́ти елей́ милосе́рдiя. Сего́ ра́ди, дѣ́лателью виногра́да Христо́ва Димит́рие, огради́ мя стра́хомъ Госпо́днимъ и напо́й мя водо́ю умиле́нiя.

**С**iя́я со́лнце Сво́е на благи́я и дождя́ на праведны́я, да и влась́ главы́ моея́ не поги́бнетъ, храни́ши мя, грѣ́шнаго. Вся́ стихií мене́ ра́ди зла́го ста́ша въ чинѣ́ своѣ́мъ, азъ еди́нъ то́чию пребы́ваю въ нечу́встви́и. Но да́ждь ми́, Гóсподи, уго́дника ра́ди Твоего́ Димит́рия разумѣ́ти дѣла́ Твоя́, и слы́ша слúхъ Тво́й, боя́тися Тебе́.

**Богоро́диченъ:** **В**негда́ прибли́житься лѣ́томъ вопло́щенiю, посредѣ́ двою́ живóтну позна́нъ бы́сть. Внегда́ прíйти вре́мени ко спасе́нiю,

посредѣ двою разбойнику явися Сынъ Твоѣ, Богородице. Непостижимо во обоихъ сихъ Слово, да мы, воплощенному и пострадавшему за ны покланяющесе Слово, Тя, Матерь Божію, въ пѣсняхъ возвеличимъ.

### **Пѣснь 5.**

**Ирмосъ:** *Божіимъ свѣтомъ Твоимъ, Блаже, утренюющихъ Ти души любовію озари, молюся, Тя вѣдѣти, Слово Божіе, истиннаго Бога, отъ мрака грѣховнаго взывающа.*

**С**вѣтильникъ ногама моима законъ Господень, и свѣтъ стезямъ моимъ оправданія Его, азъ же, во тмѣ невѣдѣнія ползя и толкѣйся, не хочу съ мудрыми свѣтилника стяжати. Но ты мнѣ, свѣтоявленне Димитріе, невѣстоводитель предстани, яко да и азъ духомъ къ Богу отъ нощи утреневати потщуся.

**Б**олѣзную тѣломъ, болѣзную и душею: овому яко досадихъ объяденіемъ и пѣянствомъ, ову же яко разслабихъ грѣхами. Сугуба болѣзнь и тяжка, но ты, новѣй чудотворче, умоли Врача всѣхъ, да обоя исцѣлѣти благоизволить.

**Г**осподи Боже нашъ, даждь намъ миръ во днѣхъ нашихъ, Господи Боже нашъ, стяжи въ насъ любовь, да вси едиными усты и единымъ сердцемъ исповѣдуемъ Единого Тя въ Троицѣ славиимаго Бога.

**Богородичень:** Страха Господня во чрѣвѣ не пріяхъ, ни сѣрдцемъ о нерадѣнїи поболѣхъ, но, прїсно зачиная и раждая грѣхи ко грѣхомъ, отъ умноженія тѣхъ совѣстю снѣдаюся. Сего ради въ многоплодіи сѣмъ беззаконномъ къ Тебѣ, Владычице, вопію: сотвори мя возродитися въ животь вѣчный покаяніемъ.

### **Пѣснь 6.**

**Ирмосъ:** *Житѣйское море, воздвизаемое зря напастей бурю, къ тихому пристанищу Твоему притекъ, вопію Ти: возведи отъ тли животь мой, Многомилостиве.*

Отъ кита Іону, отъ бла҃та же ѣзернаго тебѣ, святителю Димитріе, изведе Господь на свѣтъ, овъ триднѣвень во утробѣ не вредїся, ты же четыредесятолѣтенъ неистлѣненъ въ нѣдрѣхъ земныхъ пребылъ еси. Вѣліе чудо! Но болше дарованіе Божіе, ибо ты чудесы, яко пророка, прослави.

Дрѣвніи о́ни ниневїтяне, невѣрніи языцы сущѣ, единою пророческою проповѣдію покаялися. Азь же, толико наставленій божественныхъ имѣя и по вся дни чтомая слущая, несправенъ пребываю, но ты, святителю, молитвами твоими къ дѣланію сихъ настави мя.

**Б**ѣздна грѣховъ послѣдняя обыде мя, и треволненіе страстей погружаетъ мя. Тѣмъ, дондеже не понре душа моя во адѣ, къ Тебѣ, Господу Богу, отъ скорби вопію, да праведника Твоего ради Димитрія услышиши и спасеши мя.

**Богородичень:** Скорая въ бѣдахъ Помощнице, готовое обуреваемымъ пристанище, сохрани мя, Мати Божія, отъ потопленія житейскаго и не даждь ми разбитися о камень пагубы душевныя.

### **Кондакъ, гласъ 8:**

**З**вѣзду Россійскую, отъ Кіева возсіявшую и чрезъ Новградъ Сѣверскій въ Ростовъ достигшую, всю же страну сію ученми и чудесы озарившую, ублажимъ златословеснаго учителя Димитрія, той бо всѣмъ вся написа, яже къ наставленію, да всѣхъ приобрящеть, якоже Павель Христу, и спасеть правовѣріемъ души наша.

### **Икосъ:**

**П**раведнымъ о кающихся на небеси, намъ же, грѣшнымъ, на земли, о тебѣ, праведниче Димитріе, подобаетъ возрадоватися, яко новаго тя къ Богу молитвенника о насъ стяжачомъ. Егоже достойными похвалами ублажающе, сице отъ радости зовемъ: радуйся, Ростовская похвало и всея Россіи прославленіе.

## ПѢСНЬ 7.

**Ирмосъ:** *Росодательну убо пещь содѣла  
ангелъ преподобнымъ отрокомъ, халдеи же  
опаляющее вельніе Божіе, мучителя увѣща  
вопѣти: благословенъ еси, Боже отецъ нашихъ.*

**Я**коже тріе отроцы въ пещи вавилонстѣй  
огненную силу угасиша молитвою, тако ты,  
богоявленне Димитріе, возникшіи огонь въ  
саможегомыхъ скитахъ ученми твоими  
потребилъ еси. Отнюдуже ты за спасеніе душъ  
погибающихъ Господь прослави чудесы и  
нетлѣніемъ, мы же святолѣпными пѣснями  
ублажаемъ.

**О**, коликихъ благъ, окаяннии, лишѣстеся,  
расколницы: ни священноначалника бо имате,  
ни вождя истиннаго ко спасенію, ниже  
Безкровныя Жертвы, ниже другихъ таинствъ  
сподобляетеся. Но поне нынѣ познайте пагубное  
свое заблужденіе, и аще дѣломъ и ученію  
ангелоподобнаго Димитрія не вѣрите, то  
чудесамъ, отъ него бываемымъ, якоже халдеи  
они, вѣруйте, да съ нами купно едиными усты  
помолитеся Богу отецъ нашихъ.

**В**оистину, Боже нашъ, Ты еси единъ Богъ  
боговъ и Господь господей и развѣ Тебѣ инаго и  
Твоея Святыя Соборныя Цѣркве нѣсть ни на  
небеси, ни на земли, идѣже подобаетъ спастися.

Сего ради даждь намъ едиными усты и единымъ сердцемъ удивляющаго вся хотѣнія Своя во святыхъ, Тебѣ славити.

**Богородичень:** Провидецъ Даніиль усмотри Тя гору, Неискусомужная Дѣво, приснопамятный же во святыхъ нашъ Димитрій, якоже Гедеонъ — Руно́ Орошенное Тя нарече. Мы же, обоя исповѣдающе, просимъ: да на отторгшемся отъ Тебѣ Камени — Христъ, утверждается Церковь и правовѣрующихъ сердца росюю благодати Твоея напаяются.

### **Пѣснь 8.**

**Ирмосъ:** *Изъ пламене преподобнымъ росу источилъ еси и праведнаго жертву водою попалилъ еси: вся бо твориши, Христе, токмо еже хотѣти. Тя превозносимъ во вся вѣки.*

**Вся** средства, святителю, на взысканіе заблуждшихъ употребилъ еси, разливающійся пламень по скитамъ водою покаянія погашая, морѣлицковъ къ Безсмертной Трапезѣ призывая, просвѣщенныхъ же и отпадшихъ, да не второе крестящися паки распинаютъ Христа, единого держатися крещенія утверждалъ еси. Всѣхъ повсюду правовѣрію училъ еси, и нынѣ своими списанми томужде учиши. Тѣмъ яко истиннаго учителя во святыхъ почитаемъ тя.

Дрѣвнимъ онымъ вавилонскимъ столпотворителемъ врази нашего благочестія уподоблшеса, дерзнуша неразумія своего толки на песць суевѣрія наздати. Имже егда опрощася ученій твоихъ воды, святителю, абие поколебашася во основаніи, и бысть имъ паденіе веліе, намъ же, благочестивымъ — подкрѣпленіе и исправленіе.

**Безначалне** Отче, Сыне Собезначальне, Утѣшителю Благій Душе Правый; Слова Божія Родителю, Отца Безначална Слове, Душе Живый и Зиждяй: Троице Единице, помилуй мя.

**Богородиченъ:** Якоже купина, огнемъ распаляема, сама не сгараше, но боговидца, устрашивъ, приведе къ почитанію, тако Ты, Неискусобрачная Невѣсто, приѣмши во утробу Огнь Божества, нетлѣнна въ Рождествѣ пребыла еси. Дивное таинство! Непокорниковъ благочестію стыдомъ опаляеши, почитателей же правовѣрныхъ орошаеши чудесы изобильно.

## **Пѣснь 9.**

**Ирмосъ:** *Бога человекомъ невозможно видѣти, на Негоже не смѣютъ чини ангельстии взирати; Тобою бо, Всечистая, явися человекомъ Слово воплощенно, Егоже величающе, съ небесными вои, Тя ублажаемъ.*

**Б**лагословенъ Господъ нашъ, яко посѣти насъ въ лѣта сія и воздвиге намъ въ Православно-Россійской Цѣркви новаго чудотворца Димитрія. Якоже бо во дни живота своего служаще преподобіемъ и правдою, тако и по кончинѣ подаеть разумъ заблуждшимъ ко взысканію путей спасительныхъ.

**С**лава Тебѣ, Пастыреначальниче, яко и во дни наша поставилъ еси на стражи бодраго пастыря Димитрія, имже прогоняются посмрадшія козлища стадо Твое непорочное.

**С**лава Тебѣ, Христѣ Божѣ, благочестивымъ похвалою и правовѣрнымъ веселіемъ, яко проповѣданіе святаго Твоего Димитрія достовѣрными чудесы утверждаеши.

**Богородиченъ:** Радость отъ ангела приимшей, и мы, по прореченію Твоему ублажающе со всѣми роды, евангельски вопіемъ: радуйся, Благодатная, Господъ съ Тобою.

### **Свѣтилень, гласъ 8:**

**П**оставляяй предѣлы языковъ по числу ангель Своихъ, и собираяй отъ разсѣянныхъ сыновъ Адамлихъ Цѣрковь Свою, умножаеши въ ней святыя Твоя, Божѣ нашъ, яко звѣзды на небеси, отъ нихже просія и паметъ святителя Твоего Димитрія. Егоже ради просвѣти души,

помраченныя раздорнымъ суевѣріемъ, да вкупѣ зовемъ Ти пѣснь трегубую: аллилуія.

**Слава, и нынѣ, отданію.**

**Или сей богородичень, гласъ тойже:**

Стопамъ отходящаго отъ насъ въ горняя, святителя Димитрія послѣдующе, со упованіемъ къ Тебѣ, Владычице, вопіемъ: якоже Тя на пречистой иконѣ съ Превѣчнымъ Младенцемъ пишемую зримъ на земли, тако даждь намъ видѣти стоящую одесную Сына Твоего Бога въ неприступнѣмъ свѣтѣ на небесі.

**На хвалитехъ стихиры, гласъ 6. Подобенъ:**

**Всѣ отложше.**

Весь отъ юности твоея возложился еси\* на взысканіе премудрости и страха Божія,\* яже обрѣтъ, не въ земли, аки лѣнливый рабъ, сокрылъ еси,\* но уча и творя по Вдавшему ти талантъ,\* во сто трудовъ умножилъ еси его,\* и былъ еси великій купецъ,\* износая на свѣтъ вѣтхая и новая,\* и открывая глубины разума богописанныхъ книгъ,\* куплю добру дѣяти научилъ еси насъ.\* Тѣмъ, благій и вѣрный рабе Божій Димитріе,\* за толика явленна твоя къ намъ сокровища,\* вшелъ еси въ радость Господа Твоего.

Весь умъ плѣнилъ еси въ послушаніе вѣры,\* да благими дѣлы украсиши ю,\* отнюдуже и

дѣлатель винограда Христова явился еси искусный.\* Всяку бо розгу, не творящу плода,\* страхомъ Господнимъ посѣклъ еси,\* и едино благочестіе сохранялъ еси въ немъ,\* отвнѣ его ограждалъ еси догматы церковными,\* внутрь уду укрѣпилъ еси столпомъ правовѣрія,\* всюду предточилія ископовая ученій твоихъ.\* Тѣмъ и нынѣ, святой трудолюбче Димитріе,\* присъщай виноградъ твой,\* егѣже насади десница Вышняго,\* да плодоприноситъ гроздіе спасенія.

**В**есь невозвратно надеждою возверглся еси на Бога:\* преплаывая пучину міра сего, блаженне,\* молвами житейскими не погрузился еси,\* ниже, искушенми обуреваемъ, приразился соблазномъ,\* но, присно благодатишемъ наставляемъ,\* достиглъ еси безмолвнаго пристанища,\* и наченъ корабль Церкви Христовы правити,\* паки къ безбѣдному плаванію исправилъ еси,\* паки ереседышущія преложилъ еси въ тщету вѣтры\* и кѣтвою твоихъ наставленій утвердилъ еси егѣ,\* яко дивитися намъ и отъ Бога просити,\* да и впредь противныя ересей вѣтры\* молитвами твоими утишиши.

**В**есь еси любовію прилѣпился къ Богу и ближнему,\* пастьрское бо о стадѣ своемъ возымѣвъ попеченіе,\* душею трудился еси въ

богомысли и въ поученіяхъ,\* тѣломъ же въ  
 послуженіи трѣбующимъ отъ тебе  
 помощи:\* изнемогающія вѣрою  
 укрѣпляя,\* болящія душею покаяніемъ  
 врачуя,\* сокрушенныя совѣстію твѣрдимъ  
 упованіемъ обязуя,\* заблуждшія отъ истины на  
 путь правый обращающія\* и погибшія ересми къ  
 благочестію взыскуя.\* Тѣмъ, о пастырю нашъ  
 предобрый, святителю Димитріе,\* помолися о  
 стадѣ твоѣмъ Пастыреначалнику Христу  
 Богу,\* да упасетъ е Самъ въ единомыслии любви  
 и правовѣрии.

### **Слава, гласъ 6:**

**П**охвали, граде, Бога Твоего, Ростове, воспой,  
 Россіе, Господеви пѣснь нову, яко благоволи  
 Вышній даровати намъ новаго чудотворца  
 Димитрія, свидѣтельствовавша отъ всѣхъ и отъ  
 Самыя Истины. Егоже память во святыхъ  
 почитающе, восхвалимъ и мы, старцы съ  
 юнотами, и возвеличимъ давшаго Бога нашего  
 толикому угоднику Своему въ насъ просіяти  
 нетлѣніемъ святольпнымъ и чудодѣйствіемъ. [4]

### **И нынѣ, отданію.**

#### **Или богородиченъ, гласъ тойже:**

**К**расота дѣвства Твоего неописанна, доброта  
 Твоя, о Богомати, несказанная, избрана бо еси,  
 якоже солнце, полна, яко луна и дуга въ явленія

сво́я, а́ки стеблѡ́ Лива́ново въ жа́тву на гора́хъ, и  
я́ко кипари́сь возра́стай отъ удо́лія до небѣ́сь.  
Мно́гія добрѡ́ты Тво́я и вели́чія, Приснодѣ́во, но  
бо́лши всѣ́хъ, я́ко но́сиши Но́сящаго всѧ́. Егѡ́же  
моли́ купно со свѧ́ты́мъ Димит́риемъ, да спасе́тъ  
и просвѣ́титъ правовѣ́риемъ ду́ши на́ша.

**Славословіе великое, [тропарі] и отпу́сть.**

### **НА ЛИТУРГІИ,**

**Блаже́нна, отъ канѡ́на [свѧ́тителя] пѣ́снь 3  
и 6. Прокі́мень, гласъ 1: Уста́ моя  
возглаго́лють премудро́сть,\* и поуче́ніе се́рдца  
моего́ разу́мъ. Стихъ: Услы́шите сія́ вси́ язы́цы,  
внушите́ вси́ живу́щии по вселѣ́ннѣй. Апѡ́столю  
ко Евре́омъ, зачало́ 318. Аллилу́ія, гласъ 2:  
Уста́ праведнаго́ поуча́тся премудро́сти, [и  
язы́къ егѡ́ возглаго́летъ су́дь. Стихъ: Зако́нъ  
Бо́га егѡ́ въ се́рдцѣ егѡ́, и не за́пнутся сто́пы  
егѡ́]. Ева́нгеліе Іоа́нна, зачало́ 36.  
Прича́стенъ: Въ па́мь вѣ́чную бу́детъ  
праведникъ, [отъ слуха́ зла́ не убой́тся].**

#### **Примѣчанія:**

- [1] Такъ въ изданіяхъ 1759, 1763, 1798, и послѣдующихъ.  
[2] Въ изданіи 1759 г.: «...моли Христа Бога спастися  
ИМПЕРАТРИЦѢ нашей ЕЛИСАВЕТѢ ПЕТРОВНѢ, всему  
наслѣдію, и державѢ ЕЯ».  
[3] Въ изданіи 1759 г. (л. 3 об. – 4) вмѣсто двухъ послѣднихъ  
стихирь: «Житіе нескверно...» и «Еще отъ юна возраста...»

приведены

слѣдующія:

«Съ седмаго мѣсяца началъ еси трудитися\* въ списаніяхъ житій святыхъ,\* въ седмый и мзду пріялъ еси\* явленіемъ мощей твоихъ;\* и въ неже лѣто преставился еси,\* въ то самое отъ чреслъ ПЕТРА ВЕЛИКАГО\* испросилъ еси намъ ИМПЕРАТРИЦУ ЕЛИСАВЕТУ на свѣтъ.\* Ейже спастися и всѣмъ чтущимъ тя,\* моли новоявленне Димитріе».

«О, глубина судебъ Божіихъ!\* О, бездна неисчерпаемыхъ Его благостей!\* Како за праведниче пріятіе\* мзду праведничу САМОДЕРЖИЦА воспрія:\* по обрѣтении бо мощей святыхъ,\* за день же лѣтнія твоея памяти,\* день Благовѣрнаго Великаго Князя ПАВЛА ПЕТРОВИЧА возсія.\* Егоже да сохранитъ сице благоволивый Господь\* тебе ради, праведниче Божій Димитріе».

[4] Первоначальный вариантъ стихирь: «Воспой, Россіе, Господеви пѣснь нову, похвали, граде, Бога Твоего, Ростове, возвеселися и ТЫ, САМОДЕРЖИЦЕ наша ЕЛИСАВЕТЪ ПЕТРОВНА, яко благоволи Вышній въ царство ТВОЕ даровати намъ новаго чудотворца Димитрія, избранна ТВОИМЪ родителемъ свидѣтельствовавна же отъ всѣхъ и отъ Самыя Истины. Егоже память во святыхъ почитающе, восхвалимъ и мы, старцы съ юнотами, и возвеличимъ давшаго Бога нашего, толикому угоднику Своему въ насъ просіяти нетлѣніемъ святолѣпнымъ и чудодѣйствіемъ» (М., Синодальная Тѣпографія, 1759, л. 25 об.).

**Источникъ: Служба ѿже во святыхъ отцу нашему Димитрію, митрополиту Ростовскому, новому чудотворцу. — М.: Синодальная Тѣпографія, 1763. — 26 л.**